

**TAIM
BILONG
ATVEN
NA KRISMAS**

SANDE 1 BILONG ATVEN

1. RIT

Jer 33:14-16

Akar dapanim: Ki Devitin anabamin aven gumazitam damighti an otogh anang, mati temer ghuzir igiam otogha anadi.

Akar kam, Godin akam inigha izir gumazim Jeremaia, an osiri.

Egha Ikiavira Itir God ghaze,
 “Dughiar ki misevezim iziti, ki faragha
 Israelia ko Juda, me ko dikirizir akam
 a guizbangiram otivam. Ki dughiar
 kamin, Devitin adarazir aven gumazir
 bar aghuir tam a damuti an otogham,
 mati temer ghuzir igiam temer
 aguamin otogham. Gumazir kam
 atrivimin iki arazir aghuimin gin mangi
 guizin arazimin nguazir kamin itir
 gumamazibagh ativagh men ganam.

Eghti dughiar kamin Jerusalemin
 nguibamin itir darazi, me dabirabir
 aghuim ko navir amirizimin ikiam.
 Eghti Judaba, God men akurvaghti,
 me uam osimtiziba puvatigh deravira
 ikiam. Eghti me Jerusalem iziar kam a
 darigh a diponam, “Ikiavira Itir God, a
 guizin arazir aghuimin mingarim.”

Kar Godin Akam.

SAM

Sam 25:4bc-5ab, 8-9 10, 14

Ia akam ikaragh: O Ekiam, nan azangsizim ni bagha zui.

O Ikiavira Itir God, ni uan arazir aghuiba nan akakagh.
 Egh tuavir ki mangamiba, ni dar nan sure damu.
 Ni nan God, ni nan akuragha ua na ini.
 Kamaghin, ni uan guizin akamin gin mangamin arazibar nan sure damuti,
 ki dughiarbar zurara nighnizir gavgavim nin ikiam.

Ia akam ikaragh: O Ekiam, nan azangsizim ni bagha zui.

Ikiavira Itir God, a bar deragha an araziba bar guizbangira.
 Kamaghin, a gumazir arazir ikurabagh amiba,
 a uan arazibar gin mangasa men sure gami.
 Gumazir uari abira an apengan itiba,
 a men faragha ghua tuavim men akakazi, me arazir aghuibarama ami.
 Egha arazir a ifongezibar a men sure gami.

Ia akam ikaragh: O Ekiam, nan azangsizim ni bagha zui.

Gumazim, Ikiavira Itir Godin Akar Gavgavir Dikirizim ko an akar gavgavibar gin
 zuima,
 an an apangkuvighavira iti.
 Egha a mikemezi moghira deragha bizibagh amua, uan nighnizim gighavkirir
 puvati. Gumamazir Ikiavira Itir Godin atiatia an apengan itiba,
 a men namakam gami.
 Egha uan Akar Dikirizir Gavgavim azenara anakazi me a gifo.

Ia akam ikaragh: O Ekiam, nan azangsizim ni bagha zui.

2. RIT**1 Te 3:12 - 4:2**

Akar dapanim: En Ekiam Iesus uamateghamin dughiam, God e gavgavim en navir averibar aningam.

Akar kam, akinafarir faragha zuim, Pol Tesalonaikan gumazamiziba baghava an osirizimin aven iti.

E kamagh sua, Ekiam ia damighti arazir igharazir darazigh ifongezim bar moghira ia gizifagh egh fasfagham. E bar ia gifongezi moghira, ia vaghvagh Godin gumazamiziba ko gumazamizir igharaziba bar me gifongegh. Eghti God gavgavim ia daningti, gumazamizir en Ekiam Iesusin damazimin zueziba bar, a ko uamateghti, en God en Afeziam ian gantima ia an damazimin zuegh arazir kuraba puvatigham.

Kamaghin, en adarazi, e God ifongezir araziba bar ian akagha ghaze, arazir kaba ia dar amu. Arazir kaba, ia datirighin guizbangira dagh ami. E datirighin Ekiam Iesusin ziamin gavgavimin ia gakaghora ghaze, ia arazir kabar amu mamaghira iki. E Ekiam Iesusin ziamin ian sure gamizir Akaba, ia dagh fo.

Kar Godin Akam.

WELKAMIM GUTNIUS

Aleluia, Aleluia.

Ekiam, ni uan apangkuvim isi en akagh uam e inigh.
Aleluia.

GUTNIUS**Lu 21:25-28, 34-36**

Akar dapanim: God ua ia iniamin dughiam a roghira izegha gifa.

Ia, Krais Iesusin Akar Aghuir Luk osirizim, a baragh.

Egha Iesus ghua kamaghin migei, “Eghti arazaraziba aruem ko iakinim ko mikoveziba bativam. Eghti ongarim dipir tingaghivira ikitima nguazimin gumazamiziba bar atiatigh okam nighnigham. Eghti overiamin biziba bar nigham, kamaghin gumaziba atiatingiva damaziba men isirtima me daighiriva, egh me otivamin biziba bagh mizuamiva nighnigham. Egh me dughiar kamin Gumazibar Borimin ganti, a ghuariam in tongin gavgavim ko angazangarir ekiam sara izam. Eghti bizir kabanagh otivighritima ia dikavigh, uan dapaniba fegh gan! God ua ia iniamin dughiam roghira ize!”

Egha Iesus ghua kamaghin migei, “Ia uari bagh ganigh! Isaba ko, dipar onganiba ko nguazir kamin biziba, ia puv dagh nighnighti, da ia dikabinti, dughiar otivamin kam puram otoghiva, mati asizibar azuazimin min ian suigham. Eghti dughiar kam nguibaba koma nguazir kamin gumaziba bar me bativam. Ia zurara uari bagh gan Afeziam ko mikimvira ikitima, a gavgavim ia daningtima ia bizir otivamin kabagh itaviragham. Egh ia Gumazibar Otarimin damazimin tuivam.”

Kar, Krais Iesusin Akar Aghuim.

SANDE 2 BILONG ATVEN

I. RIT

Bar 5:1-9

Akar dapanim: Jerusalem, Godin nin adisir aghuim isi nguazimin gumazamiziba bar men akagham.

Akar kam, Godin akam inigha izir gumazim Baruk, an osiri.

O Jerusalem, ni azia ikiava aghuizir korotiaba suegh. Egh Godin gavgavim ko angazangarir ekiamin kurkazir igiabar aghuigh kamaghira iki. Egh Godin arazir aghuimin gin mangi an aven iki, mati gumazim korotiar ghurim sueghava korotiar aghuim aruzi an anevara. Egh ni Godin gavgavir ikiavira itim an suiragh an apengan iki, mati atrivim dapanir asuar aghuim isa uan dapanim garu. Guizbangira, God nin kurkazir aghuiba ko ganganir aghuim isi nguazir kamin gumazamiziba bar men akagham. Egh God ziar igiar mamning isi ni datighti aning iki kamaghira ekiam. Ziar kamning kamakin: "Arazir aghuim ni gamizi, ni navir amirizim ko dabirabir aghuimin iti," ko "Godin apengan itir arazim, a ziar ekiam ni ganidi." O Jerusalem ni dikavigh mighsiamin ghuamin pin tigh uan boribar gan. Godin Bar Zuezim, ghua aruem anadi naghin ko aruem ghuaghiri naghin, men diazi me uari akuvagha iti. Me

fo, God me ginighnigha men akura. Bizir kam bagha, me bar akonge. Nin apaniba fomira me inigha men akua uan suebar ghue. Eghti datirighin God ua men aku iziti me iziar ekiam iniam. Mati, gumaziba uan atriviba ateri moghin, izam. God akar gavgavim aniga ghaze, mighsiar ekiaba ko mighsiar doziba da bar magireghti, danganir iraghueziba uam izevegham. Nguazim bar voroghira irighiv ikiti, Israelia ua izi Ekiamin gavgavim ko angazangarim sara uan nguibamin izam. God mikimtima, temer mughuriar aghuiba zuiba otiv aghungti, Israelia dar orangtizimin apengan mangam. God Israelian faragh mangiti me tuavimin izi an gavgavim ko angazangarimin ganti, a tuavim men akagham. Eghti an guizin arazim ko apangkuvizir arazim ikiti me izi pamtem dimiva bar akuegham.

Kar Godin Akam.

SAM

Sam 126:1-6

Ia akam ikaragh: O Ekiam, e nin ingangarir ekiam bagha bar akonge.

Ikiavira Itir God uam e inigha Saionin nguibamin ize,
ezi dughiar kam e ghaze, e mati irebamin gari.
Kamaghin, e akava ighiabagh amuavira iti.
Ezi kantrin igharazibar gumaziba e migia ghaze,
"Ikiavira Itir God, Israelian akurvaghasa maburan ingangarimram ami."

Ia akam ikaragh: O Ekiam, e nin ingangarir ekiam bagha bar akonge.

Bar guizbangira, Ikiavira Itir God en akurvaghasa bar ingangarir ekiam gami,
kamaghin e datirighin naviba deragha bar akonge.

O Ikiavira Itir God,
Ni ua deraghvira e damuam.
E mati dipaba puvatizir danganimin itir faneba dipaba dake,

ni amozim damighti a ua iziti da ua izevegham.
Kamaghira, ni e damuti e izivagham.

Ia akam ikaragh: O Ekiam, e nin ingangarir ekiam bagha bar akonge.

Gumazir aravira dagheba opariba,
me dar dagheba iniva bar akuegh dimiva arangam.

Ia akam ikaragh: O Ekiam, e nin ingangarir ekiam bagha bar akonge.

Guizbangira, gumazir aravira dagher oviziba atera ghua da opariba,
me dar dagheba inigh uamategh ighiabara amu da ater izam.

Ia akam ikaragh: O Ekiam, e nin ingangarir ekiam bagha bar akonge.

2. RIT

Fl 1:4-6, 8-11

Akar dapanim: Krai gumamaziziba tuisighamin dughiam, ia bar zuegham.

Akar kam, akinafarir Pol Filipain gumamaziziba baghava an osirizimin aven iti.

Dughiar faragha zuimin ghua iza datirikin, ia nan akurvagha na ko akar aghuimin ingangarim gami. Kamaghin amizi, dughiar ki ia bagha God ko migeiba, ki zurara bar akonge. Ezi ki kamaghin fo, God uabi ingangarir kam ia ganiga, egha ian navir averiabar aven ingar mangi, Krai Iesus Ua Izamin Dughiamin ingangarir kam a givagham.

God kamaghin fo, Krai Iesusin apangkuvim uabi nan navim gamima ki bar ian ganasa bar ifonge.

Ezi ki zurara kamaghin God ko migia ghaze, arazir igharazir darazigh ifongezim, a ian ikiva aghungiva

ekeveghiva mangvira iki. Eghti ia fofozir ekiam ikiva, egh ian nighniziba bar dikirimigham. Ki ghaze, ia deravira araziba bar dar gan da asavsuighiva arazir aghuibar gin mangi. Eghti Krai Ua Izamin Dughiamin, ia Godin damazimin bar zuegh ikiti arazir kuratam ian poroghan kogham. Eghti arazir aghuir Krai Iesus amizir otiviba, da bar ia gizivagham. Eghti gumamaziziba dar ganiva ziar ekiam God daningiva egh an ziam fam. Kamaghin, ki ia bagha God ko migei.

Kar Godin Akam.

WELKAMIM GUTNIUS

Aleluia, Aleluia.

Ia Ekiam bagh tuaviba akir. Eghti nguazimin gumamaziziba God me bagha ingagarigha ua me inizir ingangarir kamin ganam.

Aleluia.

GUTNIUS

Lu 3:1-6

Akar dapanim: Nguazimin gumamaziziba bar moghira, God uam e inizir ingangarimin ganam.

Ia, Krai Iesusin Akar Aghuir Luk osirizim, a baragh.

Dughiar kam Taiberius Sisarin 15 plan azenimin Romin atrivimin itim oto. Ezi Pontius Pailat Judian Distrighin gavmanin gumazir dapanimin iti, Herot Galilin Distrighin

gavmanin gumazir dapanimin iti. Ezi an aveghbuam Filip Iturian Distrigh ko Trakonitisin Distrighin gavmanin gumazir dapanimin ti, ezi Lisania Abilenen Distrighin gavmanin

gumazir dapanimin iti. Ezima Anas ko Kaiafas Godin ofa gamir gumazir dapanimningin iti. Dughiar kam Jon, Sekaraian otarim, gumaziba itir puvatizir danganimin itima, God uan migirigiam a ganingi. Ezi Jon Jordanin dipar miriamin aruava akam kura kamaghin migei, “Ia uan navibagh iraghiva rueghti, God ian arazir kuraba gin amadagham.” Godin akam inigha izir gumazim Aisaian akinafarimin osirizir migirigiabar mirara ghu, a kamaghin migei,

“Gumazir tiarir mam gumaziba puvatizir danganimin dia ghaze,

‘Ia Ekiam baghiva tuaviba azeniva, dar kir.
Kukuniba apemiva, mighsiaba ko akiribar amuti da magiri.
Tuavir ighuagha aruiba dar amuti da voroghira iki.
Egh tuavir kurabar amuti da deragh.
Eghti nguazir kamin gumazamiziba bar
Godin akurvazimin ganam.’ ”

Kar, Krais Iesusin Akar Aghuim.

SANDE 3 BILONG ATVEN

1. RIT

Sef 3:14-17

Akar dapanim: Ekiam ia bagh bar akuegham.

Akar kam, Godin akam inigha izir gumazim Sefanaia, an osiri.

O Israelian gumazamiziba, ia pamten
dimiva ighiabar amu!

O gumazamizir Jerusalemin
nguibamin itiba,

ia navir averiaba deraghti ia bar
akuegh mamaghira iki!

Ikiavira Itir God, ia gasighasighasa
mikemezir akar kam,

an anegivagha ian apanibar agirazi
me are.

Ikiavira Itir God, a Israelian atrivim, a
ian tongin iti.

Kamaghin, ia bizitamin atiatingan
marki.

O Jerusalem, dughiam iziti me ni
mikim suam,

“Ia Saionin gumazamiziba,
ia puram akong bizitamin
atiatingan marki.

Ikiavira Itir God, a ian God, a ia ko iti.

An gavgavim ian akura, ezi ia
midorozimin uan apaniba abira.

A ia bagha bar akongegh ighiabar
amuam.

Mati gumazamiziba uari akuva
Godin iziam fa onger akabagh
ami moghin, a ia bangin pamtem
ongam.

Guizbangira a bar ia gifongezi, an
ifongiamin aven a ia damuti ia
deravira ikiam.

Kar Godin Akam.

SAM

Ais 12:2-6

Ia akam ikaragh: God an eko iti, ezi e a bagh onger akabar amu bar akuegham.

“Ia oragh! God nan akuragha ua na ini.

Eghti ki nighnizir gavgavim an ikiva egh atiatingan kogham.

Ikiavira Itir God, a Godra, a na gamima, ki gavgavigha iti.

Guizbangira, a nan akurvazir gumazim, ezi ki an ziam fava onger akam gami.”

Mozir dipam, gumazir kuariba piriba, anepa bar akonge.

Ezi kamaghira, God uan gumazamizibar akuragh ua me inighti, me bar
akuegham.

Ia akam ikaragh: God an eko iti, ezi e a bagh onger akabar amu bar akuegham.

Dughiar kamin ia kamagh mikimam,

“E Ikiavira Itir God, an iziam dipon egh a minabiva, uarir akurvaghshi an dimam.

Egh ingangarir ekar an amizibar gun kantribar gumazamiziba bar moghira me
mikimiva,

an iziar ekiamin gun mikim.

Ia nguazimin gumazamiziba bar, Ikiavira Itir Godin ingangarir bar ekar an
amizibar akam baragh.

Kamagh amizi, e a bagh onger akabar amu, an iziam fam.

Ia akam ikaragh: God an eko iti, ezi e a bagh onger akabar amu bar akuegham.

O Saionin mighsiamin itir gumazamiziba, ia fo, Israelian Godin Bar Zuezim, a ian tongin ikia ingangarir ekiabagh amua iziar bar ekiam iti.

Kamaghin, ia pamten dimiva arang bar akuegh onger akabar amu.”

Ia akam ikaragh: God an eko iti, ezi e a bagh onger akabar amu bar akuegham.

2. RIT

Fl 4:4-7

Akar dapanim: Ekiamin ua izamin dughiam, a roghira ize.

Akar kam, akinafarir Pol Filipain gumazamiziba baghava an osirizimin aven iti.

Ia Ekiam ko porogh iki egh zurara bar akongegh. Ki ua migei, ia bar akongegh.

Ia gumazamiziba bar men asughasugh, eghti me ian arazir aghuir kamin ganigh. Ia nighnigh, Ekiam roghira izi. Ia bizitam bagh nighnighiv osiman marki. Ia zurara uan osimtiziba bagh God ko mikim. Ia God ko mikim a minabiva, egh a ian akurvaghsi ia an azang. Eghti kamaghin God ia damuti ia

navir amirizimin ikiam. Egh ia Kraiss Iesus ko poroghiv deragh ikiam, eghti tuavir kamin Godin navir amirizim deravira ian naviba ko nighnizibagh eghuvti da bar deravira ikiam. God navir amirizir e ganingizir kam, a bar bizir aghuim, ezi navir amirizir kam gumazibar fofozim bar a gafira.

Kar Godin Akam.

WELKAMIM GUTNIUS

Aleluia, Aleluia.

God uam e inigha uan otarir a bar ifongezimin adarazir tongin e at.

Aleluia.

GUTNIUS

Lu 3:10-18

Akar dapanim: E manmaghira damuam?

Ia, Kraiss Iesusin Akar Aghuir Luk osirizim, a baragh.

Ezi gumazamiziba Jonin azara, “Ezi e manmaghira damuam?” Ezi Jon me ikara, “Gumazir korotiar aven azuir pumuning itim, tam isi gumazir puvatizim daningigh. Ezi dagheba itiba uaghan kamaghira damu.” Ezi gavmanin dagiaba isir gumaziba uaghan ruasa ize. Egha me azangsigha ghaze, “Tisa, e manmaghira damuam?” Ezi a kamaghin me migei, “Gumazibar dagiabagh isin ua dagiataba inian marki.” Ezi midorozir gumazir maba Jonin azara, “Ezi eia, e manmaghira damuam?” Ezi a me ikara, “Gumazamizibar dagiaba okimsiva akar ifavaribar me gasan marki. Ia uan ingangarimin ivezimra initi deragham.”

Gumazamiziba bizir kabar garima men navir averiaba me ginivima me pura nighnigha ghaze, Jon ti God Ua Gumazamiziba Iniasa Misevezir Gumazim? Ezi Jon bar men nighniziba ikara, “Ki dipamin ia rue. Ezi gumazir mam gin izam, an gavgavim bar nan gavgavim gafira. An dagarir asuabar beniba ki da firan gavgaviba puvati. A Godin Duam ko avimin ia ruam. A witba misevir savol an agharimin iti, eghti a uan witba misiva dar daghebar arighiva, witba misevir dipenimin witin miseviba aviva, egh dar miseviba avir munger puvatizimin da akuntima, da isiam.” Egha Jon migirigiar avirir maba

sara me migia men navibagh inifi. Egha
kamaghin akar aghuim me mikiri.

Kar, Krais Iesusin Akar Aghuim.

SANDE 4 BILONG ATVEN

1. RIT

Mai 5:2-5a

Akar dapanim: Ian gumazitam gumazir dapanimin otogh egh nan ziamin Israelia gativagh men ganam.

Akar kam, Godin akam inigha izir gumazim Maika, an osiri.

Ikiavira Itir God ghaze,
 “O Betlehem, ni Efratan distrighin
 itir nguibam, ni Judan anababar
 nguibabar tongin, ni nguibar bar
 dozim,
 ezi nin aven gumazitam na bagh
 gumazir dapanimin otogh Israelia
 gativagh men ganam.
 Ezi bar fomira, an ovavir bar
 faraghavira itim, an otogha ike,
 ezi an adarazi datirighin ikia
 ghuavira iti.”
 Eghti kamaghin, Ikiavira Itir God uan
 adarazi ateghti,
 me uan apanibar dafaribar ikivira
 iki mangiti,
 amizir God inabazim, an otarim
 bategham.
 Eghti dughiar kamin Israelian kantrin
 igharazibar ikeziba uamategh izi
 uan adarazi ko ua uari akuvagh.
 Eghti gumazir dapanir kam otogh,
 uabi uan gumazamiziba Ikiavira Itir
 Godin gavgavimin men ganam,

mati sipsipbagh eghuvir gumazim
 deravira uan sipsipbar gari.
 Guizbangira, a Ikiavira Itir God,
 an God, an an ziar ekiamin me
 gativagham.
 Eghti gumazamizir kantrin
 igharazibar itiba an gavgavim
 gifogham.
 Eghti kamaghin an gumazamiziba
 deragh ikiam.
 Egh a navir amirizim ko dabirabir
 aghuim isi uan gumazamiziba me
 daningam.
 Eghti Asirian midorozir gumaziba
 izi en nguibar ekier gavgavibar
 divaziba akarti,
 e uan midorozir gumazibar
 faragha zuir gumazir gavgaviba
 amiseveghti, me mang me ko
 misogham.

Kar Godin Akam.

SAM

Sam 80:2-3, 15-16, 18-19

Ia akam ikaragh: Ekiamin apangkuvim itima e dera.

O Israelia geghuvir gumazim, ni deravira e barakigh.
 Ni uan atrivir dabirabim gaperaghav ikia, enselin bar gavgaviba ni men pin iti.
 Ni uan angazangarim e gisiragh.
 Ni uan gavgavim akagh izi en akuragh.

Ia akam ikaragh: Ekiamin apangkuvim itima e dera.

O Godin Gavgaviba Bar Itim, ni uam e ginighnigh,
 uan Nguibamin pin iki vanginan wainin ikarzir kam deraghvira an gan.
 Ni uabi uan agharir guivimin wainin ikarzir kam akara.
 Ni wainin biar igiam akarazi an aghua gavgavigha gifa.

Ia akam ikaragh: Ekiamin apangkuvim itima e dera.

Nin gumazamizir ni ua bagha inabaziba,

ni me gamizi me ekevegha bar gavgafi.
 Ni men akuragh deragh men gan.
 Ni kamagh damighti e uam akirim ragh ni gasan kogham.
 Ni en akuraghti e angamra deravira iki, nin ziam fam.

Ia akam ikaragh: Ekiamin apangkuvim itima e dera.

2. RIT

Hi 10:5-10

Akar dapanim: Ki nin ifongiamin gin mangasa ni bagha izegha gifa.

Akar kam, a Hibrun akinafarimin aven iti.

Ezi bizir kam bagha, Krai nguazir
 kamin izasava amir dughiamin a
 kamaghin Godin migia ghaze,
 “Ni guizbangira, asizibar ghuziba ko
 bizir ofan min me ni ganidiba, ni
 bizir kabagh ifongezir puvatigha
 da inian aghua.
 Kamaghin ni mikarzir mam na
 daningasa an ingari.
 Asizir me tuazi bar isiziba, ko arazir
 kuraba gin amadir ofaba,
 da ni gamima ni dar agorogem itir
 puvati.
 Ezi ki kamaghin migei, ‘God, kira
 kara. Fomira Moses nan gun
 Akinafarimin aven osirizir
 moghin.
 Datirighin ki izegha gifa, egha nin
 ifongiamin gin mangasava ami.’ ”
 A faragha ofabav gei, ofan kaba,
 Moses Osirizir Arazibar amuasa
 mikeme. A kamaghin migei, “Ni

asizibar ghuziba ko, bizir me ofan
 min ni ganidiba ko, asizir ofa gamir
 dakozimin tuezi da bar isiziba ko,
 arazir kuraba gin amadir ofaba, ni
 bar dagh ifongezir puvatigha da
 inian aghua.” Egha a gin kamaghin
 migei, “God, kira kara. Datirighin ki
 izegha gifa, egha nin ifongiamin gin
 mangasava ami.” Kamaghin amizima
 God ghaze, ofa gamir arazir ghuriba,
 da gavgaviba puvatighava, gifa. Ezi
 ofa gamir arazir igiam, an danganim
 inigha gavgavim ikia ingari. Krai Iesus
 a Godin ifongiamin gin ghua, egha
 dughiar bar vamira uabi uan mikarzim
 isa ofan min en arazir kuraba bagha
 God ganingi. Ezi arazir kamin an e
 gamizi, e Godin damazimin zuegha an
 gumamazizibar otifi.

Kar Godin Akam.

WELKAMIM GUTNIUS

Aleluia, Aleluia.

Ki Ekiamin ingangarir amizim, ni migei moghin bizir manam an a damusi a damu.
Aleluia.

GUTNIUS

Lu 1:39-45

Akar dapanim: Ki tinara, ezi Ekiamin amebam na bagha izi?

Ia, Krai Iesusin Akar Aghuir Luk osirizim, a baragh.

Ezi dughiar kamin Maria uan biziba
 akirighava zuamira nguibar ekar
 Judian Distirighin mighsiamin itimin
 ghu. Egha a Sekaraian dipenimin aven
 ghugha dughiam Elisabet ganingi.
 Ezi Elisabet Marian tiarim barazima,
 an borim an navimin aven aguaghfa,

ezima Elisabet Godin Duam a gizifa.
 Eghava a pamtemin tiarim akarigha
 kamaghin migei, “Ni amizibagh
 afirazi God bar bizir aghuim ni gami.
 Egh a uaghan bizir aghuim borir ni
 oteghamim gami. Ezi God tizim bagha
 deravira na gami, ezima nan Ekiamin

amebam na bagh izi? Ezi ki ni barazi, ni
dughiam na ganingizima borir na navir
averiamin itim bar akuegha aguaghfa.
Ni nighnizir gavgavim Godin iti, ezi

Ekiam ni mikemezi moghin bizibar ni
gami. Kamaghin ni bar akongegh.”

Kar, Krais Iesusin Akar Aghuim.

PESTODE BILONG KRISMAS

1. RIT

Ais 62:1-5

Akar dapanim: Ekiam, ni bagha navir aghuim ikia ni bagha bar akonge.

Akar kam, Godin akam inigha izir gumazim Aisaia, an osiri.

Ki Sionin nguibam bagh pamtemin
Ekiamin mikimvira ikiti a
deravira a damuam.
Guizbangira, ki Jerusalemin
nguibam ginighnighivira iki, egh
kamaghin ki akam dukuaghan
kogham. Bar puvatigham.
Egh ki Ekiamin dimvira iki mangiti,
arazir aghuimin dughiam nan
gumazamizibar otogham,
mati aruemin angazangarim
mizarazimin otifi.
Ki Ekiamin dimvira iki, mangi
dughiar God Jerusalemin
akurvaghamim, a mati adenir
angazangarir dimagarimin
otivim.
Eghti kantrin igharazibar
gumazamiziba ganti, God nin
akurvagh egh suam, ni an
damazimin dera.
Eghti atriviba ganti, God gavgavim
ko ziar ekiam isi ni daningam.
Egh me iziar igiam ni darigham,
kar iziar Ikiavira Itir God uabi ni
daningamim.
Eghti ni atrivimin dapanir asuar
aghuimin min ikiam, me bar
deraghaviram an kurke.

Eghti Ikiavira Itir God, ian God,
dapanir asuar aghuir kam uan
dafarimningin an suiragham.
Eghti gumaziba ua kamaghin ni
diponan kogh suam, "Ekiam
anetegha gifa."
Egh nin nguazim me ua kamaghin a
diponan kogh suam, "Nguazir
kam, gumaki, a bar ikuvigha pura
iti." Puvati.
Me iziar igiam kamaghin ni dipon
suam, "Ki bar a gakonge."
Egh nin nguazim me kamaghin
a diponam, "An amizir pamin
itimmin min iti."
Me kamaghin fogham, Ekiam navir
aghuim nin ikiava, egha ni bagha
bar akonge. Ezi nin nguazim mati
amizim, an pam uam a ini.
Egh nin otariba ni inigh, ni ko
deraghvira ikiam, mati gumazir
igiam amizir igiamin ikia, aning
uaning ko deravira iti.
Guizbangira, ian God bar ni
gakuegham, mati gumazim
igiamra amuimin ikia uan amuim
gakonge.

Kar Godin Akam.

SAM

Sam 89:4-5, 16-17, 27, 29

Ia akam ikaragh: Ekiam, ki nin apangkuvir arazim bagha bar akuegha ighabagh ami.

Ni kamaghin migia ghaze, "Ki gumazir mam ginabagha a koma akar gavgavir
dikirizim gami.
Ki uan ingangarir gumazim Devit ko, akar gavgavim gamigha gifa.
Ki kamaghin a migia ghaze, 'Nin adarazira, zurarama atrivibar otivam.
Nin adarazir aven atrivitam otogh, iki mamaghira ikiam.' "
(Ighiam gamua an suiam atugha avughsegha ua ighiam gami.)

Ia akam ikaragh: Ekiam, ki nin apangkuvir arazim bagha bar akuegha ighabagh ami.

O Ikiavira Itir God, gumazamizir ighiabagh amua nin ziam feba, me bar akongegh.
 Nin angazangarim me gisirazi moghin, ni bar me gifuegha men boroghira iti.
 Ni bar deravira me gamima,
 me bar akuegha dimagariba ko aruebar nin ziam fa ighiabagh ami.

Ia akam ikaragh: Ekiam, ki nin apangkuvir arazim bagha bar akuegha ighabagh ami.

A kamagh na mikim suam, Ni nan God nan afeziam. Ki zurara an apangkuv an akurvagh mamaghira ikiam.
 Ki a ko Akar Gavgavir Dikirizim damighti,
 akar gavgavir dikirizir kam, gavgavigh iki mamaghira ikiam.

Ia akam ikaragh: Ekiam, ki nin apangkuvir arazim bagha bar akuegha ighabagh ami.

2. RIT

Ap 13:16-17, 22-25

Akar dapanim: Pol, a Kraisin gun migia ghaze, a Devitin borim.

Akar kam, an Aposelbar Ingangaribar Akinafarimin aven iti.

Ezi Pol dikavighava, uan dafarimin me aminiva, kamaghin migia ghaze, “Ia Israelin gumaziba ko Kantrin Igharazibar Gumaziba, Godin apengan ikiava uari isava God ganidi, ia na baragh! Dughiar kamin me Israelin ikiava, Israelbar God en ovaviba amiseveghava, gumazibagh amim me bar aviraseme. Eghava a uan gavgavimin Isipin me inighava azenim gati. Fomira Israelin gumazamizibar God en ovaviba amisevezima, kamaghin me an gumazamizibara. Egha gin me uan nguibam ategha ghua Isipin kantrin ghue. Egha dughiar kamin God me gamima men dibobonim bar pin ghua, me bar aviraseme. Ezima gin God uan gavgavimin Isipin me inighava azenim gati.”

Egha Pol ghua kamaghin migei, “God Sol agivaghava, Devit

amisevezima an an danganim inighava atrivimin oto. Ezima a Devitin gun me migei, ‘Ki Devitin gani, Jesin otarim, gumazir ki bar ifongezim, a bar bizir ki ifongezibar amuam.’

God fomira akam akirizir moghin, God gumazir mam amadazi a Israelin ize. A Iesus, Devitin ovavir mam, en Akurvazir Gumazim.

Iesus tighar izamin dughiamin, Jon faragha izava navibagh iraghamin akam ko rurumin akamin Israelin gumazibav gei. Jonin ingangarir dughiam givasava amima, a kamaghin me migei, ‘Ia ghaze, ki tina? Ki gumazir ia mizuaim puvati. A nan gin izi. Ki an dagarir asuabar beniba firan kogham. Ki gumazir kinim.”

Kar Godin Akam.

WELKAMIM GUTNIUS

Aleluia, Aleluia.

Nguazimin osimtiziba gurumizaraghan givagham. Eghti gumazir en akuragha ua e inzim an atrivimin ikiam.

Aleluia.

GUTNIUS (longpela Rit)**Mt 1:1-25**

Akar dapanim: Kar, Iesus Kraisin ovavibar eghaghanim.

Ia, Krai Iesusin Akar Aghuir Matyu osirizim, a baragh.

Kar Krai Iesusin inaziba ko ovavibar eghaghanim. Iesus a Devitin ovavim. Ezi Devit Abrahamin ovavim. Abraham Aisakin afeziam. Ezi Aisak, Jekopin afeziam. Ezi Jekop Juda ko an aveghbuabar afeziam.* Ezi Juda, Peres ko Seran afeziam. Aningin amebam Tamar. Ezi Peres Hesronin afeziam, Ezi Hezron, Ramin afeziam. Ezi Ram Aminadapin afeziam, Ezi Aminadap Nasonin afeziam; Ezi Nason Salmonin afeziam. Ezi Salmon Boasin afeziam. An amebam Rahap. Ezi Boas Obetin afeziam, an amebam Rut. Ezi Obet Jesin afeziam, Ezi Jesi Atrivim Devitin afeziam.

Ezi Devit Solomonin afeziam, an amebam Urian amuim.* Ezi Solomon Rehoboamin afeziam. Ezi Rehoboam Abiyan afeziam, Ezi Abiya Asan afeziam. Ezi Asa Jehosafatin afeziam. Ezi Jehosafat Jehoramin afeziam. Ezi Jehoram Usian afeziam. Ezi Usia Jotamin afeziam. Ezi Jotam Ahasin afeziam. Ezi Ahas Hese kian afeziam. Ezi Hese kia Manasen afeziam. Ezi Manase Emonin afeziam. Ezi Emon Josaian afeziam. Ezi Josaia Jehoiakin ko an aveghbuar mabar afeziam. Dughiar kamin Israelia ghua Babilonin kalabusin ghue.

Ezi me Babilonin kalabusin ghuezi, gin Jehoiakin Sealtielin afeziam. Ezi Sealtiel Serubabelin afeziam. Ezi Serubabel Abiutin afeziam. Ezi Abiut Eliakimin afeziam. Ezi Eliakim Asorin afeziam. Ezi Asor Sadokin afeziam. Ezi Sadok Akimin afeziam. Ezi Akim Eliutin afeziam. Ezi Eliut Eleasarin afeziam. Ezi

Eleasar Matanin afeziam. Ezi Matan Jekopin afeziam. Ezi Jekop Josepin afeziam, a Marian pam.

Ezi Maria Iesus bate, ezi me ziar kam Krai a gati. A Gumazir God Uam E Iniasa Misevezim. Kamaghin Abrahamin dughiamin ikegha ghua Atrivim Devitin dughiamin tu, 14 plan ovaviba otifi. Ezi Devitin dughiamin ikegha ghua dughiar Israelia Babilonin nguibamin Kalabusin ikezim, 14 plan ovaviba otifi. Ezi dughiar me kalabusin ikezim ikegha ghua God Uam E Iniasa Misevezir Gumazim, Kraisin dughiamin tuzim, uaghan 14 plan ovaviba otifi.

Krai Iesus otozir eghaghanimra kara, a God Uam e Iniasa Misevezir Gumazim. An amebam Maria, me Josepin ikiasa a ginaba. Egha aning tighar uaning inigh ikiasava amima, Maria navim asangi. Godin Duamra borim a gati. Ezima Josep Godin damazim derazir gumazim an averara Maria ataghraghasa nighnisi. An azenimin Maria aghumsizim a daningan aghua. Egha a kamaghin nighnigha itima Ekiamin enselin mam irebamin kamaghin a migei, "Josep, ni Devitin ovavim, ni atiatingan marki. Ni Maria inigh an iki. A navim asangizir borim, a Godin Duam da ize. An otarim bateghtima, eghti a uan gumazamizibar arazir kuraba gin amadagh men akurvagham. Kamaghin ni ziam Iesus a datigh."*

Arazir kabanagh kamaghin otiva, egha Godin akam inigha izir gumazir mamin migirigiamin miraram otifi. A

kamagh mikeme, “Amizir gumazitam ko akuizir puvatizim navim asegh, otaritam bategham. Eghti me ziar kam Emanuel a darigham, ziar kamin mingarim kara, ‘God e ko iti.’ ” Ezi Josep daguraguimin dikavigha, Ekiamin ensel irebamin aven a mikemezi

moghin, ghua Maria inigha an iti. A poroghamiba uari isava akuir arazitam Maria gamizir puvatigha, ghua an otarim bate. Ezi a ziam Iesus a isa a gati.

Kar, Krai Iesusin Akar Aghuim.

GUTNIUS (sotpela Rit)

Mt 1:18-25

Akar dapanim: Kar, Iesus Kraisin ovavibar eghaghanim.

Ia, Krai Iesusin Akar Aghuir Matyu osirizim, a baragh.

Krais Iesus otozir eghaghanimra kara, a God Uam e Iniasa Misevezir Gumazim. An amebam Maria, me Josepin ikiasa a ginaba. Egha aning tighar uaning inigh ikiasava amima, Maria navim asangi. Godin Duamra borim a gati. Ezima Josep Godin damazim derazir gumazim an averara Maria ataghraghasa nighnisi. An azenimin Maria aghumsizim a daningan aghua. Egha a kamaghin nighnigha itima Ekiamin enselin mam irebamin kamaghin a migei, “Josep, ni Devitin ovavim, ni atiatingan marki. Ni Maria inigh an iki. A navim asangizir borim, a Godin Duam da ize. An otarim bateghtima, eghti a uan gumazamizibar arazir kuraba gin amadagh men akurvagham. Kamaghin ni ziam Iesus a datigh.”*

Arazir kabanagh kamaghin otiva, egha Godin akam inigha izir gumazir mamin migirigiamin miraram otifi. A kamagh mikeme, “Amizir gumazitam ko akuizir puvatizim navim asegh, otaritam bategham. Eghti me ziar kam Emanuel a darigham, ziar kamin mingarim kara, ‘God e ko iti.’ ” Ezi Josep daguraguimin dikavigha, Ekiamin ensel irebamin aven a mikemezi moghin, ghua Maria inigha an iti. A poroghamiba uari isava akuir arazitam Maria gamizir puvatigha, ghua an otarim bate. Ezi a ziam Iesus a isa a gati.

Kar, Krai Iesusin Akar Aghuim.

1. RIT

Ais 9:2-7

Akar dapanim: Otarir mam, e bagh otogha gifa, an otarir God e ganingizim.

Akar kam, Godin akam inigha izir gumazim Aisaia, an osiri.

Gumazamizir arazir kurabar
mitatemin aven aruiba,
me datirighin angazangarir
ekiamin gani.
Me danganir mitatemin apiaghav
ikiava aremeghasava ami,
ezi datirighin aminim tirazi
angazangarim me gisira.
Ikiavira Itir God, ni uan
gumazamizibagh amizima, me
bar aviraseme,
Ni me gamizi, me bar akonge.

Me nin damazimin bar akongezir
arazir kam, mati me azenibar
dagheba asia da bagha bar
akonge.
Egha mati midorozir gumaziba
midorozim gamigha givagha,
bizir me iniziba da tuiragha uari
ganiga bar akonge.
Gumazamiziba bar akongezir bizim, a
kamakin:
Ni fomira Midianin kantrin
gavgaviba apiragharighizi

moghin, datirighin men apanibar
 gavgaviba apiragharigha gifa.
 Guizbangira, apaniba faragha nin
 gumamazizibagh ativagha,
 egha me gamima, me mati
 bulmakaun mam, gumazim
 palang isa an akiragharim
 garugha egha ingangarim
 zuamiram a damuasa a gaghora a
 misosi.
 Ezi ni apanibar aghoriba ko palangba
 apiragharighizi, me ua nin
 gumamaziziba paza me gamir
 puvati.
 Guizbangira, midorozir gumaziba
 midorozir korotiar aghua ghua
 misoziba,
 avim bar dar isigham.
 Men dagarir asuaba ko men korotiar
 gumazibar ghuziba itiba,
 avim bar adar isigham.
 Eghti osimtiziba bar givaghtima,
 dughiar aghuim otogham.
 Bar guizbangira, otarir mam amebam
 e bagha a bate,
 a borir God e ganingizir mam.
 Eghti an e gativagh en ganamin
 arazir kam, mati gumazim
 dipenir akinir dafam uan dipizim
 gatigha aneteri.
 Kar an ziaba,

Gumazir Nighnizir Bar Aghuiba
 Anidim,
 ko Godin Gavgaviba Bar Itim,
 ko Afeziar Zurara Ikiavira Itim,
 ko Atrivir Dabirabir Aghuim ko
 Navir Amirizim Anidim.
 Eghti atrivir kam, Atrivim Devitin
 danganim inigh, Devitin
 atrivir dabirabim daperagh
 gumamazizibar ganam.
 Eghti a gumamazizibagh ativagh men
 ganamin gavgavir kam, an ekiva
 mangivira ikiam.
 Kamaghin midoroziba ua
 puvatighti,
 gumamaziziba navir amirizimin
 ikia deraghvira dapiagh iki
 mamaghira ikiam.
 Atrivir kam biziba deragha da
 tuisigha, Godin arazir aghuibara
 amuasavira iti.
 A kamaghin damuti, an atrivir
 ingangarim datirighin ikegh
 gavgavigh mangivira ikiam.
 Ikiavira Itir Godin Gavgaviba
 Bar Itim, uan gumamaziziba
 guizbangira bar me ifonge,
 kamaghin a bizir kam damighti
 an otogham.

Kar Godin Akam.

SAM

Sam 96:1-3, 11-13

Ia akam ikaragh: Datirighin Kraish oto, a en Ekiam.

Ia onger akar igiatam Ikiavira Itir God bagh, a bangi.
 Ia nguazimin gumamaziziba bar, a bagh ighiabar amu.
 Ia Ikiavira Itir Godin ziam fi, a bagh onger akabar amu. }
 Ia, an gavgavim ko ingangarir aghuir an amibar gun kantriba bar dar
 gumamaziziba, me mikim.

Bekim:

Nguazim ko overiam, gua bar akongegh,
 ongarim, ni bar akuegh egh niginir dafam damu.
 Ia ongarimin aven itir biziba, ia uaghan bar akongegh.
 Ia azeniba, ko azenibar aghuir biziba, ia bar moghira bar akongegh.
 Ia ruaribar temeba ia uaghan ighiabar amu bar akongegh.

Bekim:

Ia bar moghira izi, Ikiavira Itir Godin damazimin ighiam damu.

A izi nguazimin gumamaziziba bar me gativagh men ganam.
Ikiavira Itir God, uan arazir aghuimin gin mangi, gumamaziziba bar me
gativagh,
uan guizin akamin men araziba tuisigham.

Bekim:

2. RIT

Ta 2:11-14

Akar dapanim: Godin apangkuvim, an azenim girigha gifa.

Akar kam, akinafarir Pol Taitas baghava an osirizimin aven iti.

E fo, Godin apangkuvim azenim girigha givazi, gumamaziziba bar an gari. God uan apangkuvir kamin en akurvasi. God uan apangkuvir kamin en sure gamua ghaze, e God aghuazir araziba ataghraghiva egh nguazir kamin arazir ifongeziba ataghragham. Egh uaghan navir ghurimin araziba dikabiniva egh arazir God ifongezir aghuibar amuasa, en sure gami. Guizbangira e nguazir kamin gumamazizibar tongin iti, ezi God uan apangkuvimin tuavimin a ifongezir arazibar gin mangasa, en sure gami. Dughiar e nguazir kamin itim, e bizir

e damightima e bar akueghamim bagha mizuai. A kamakin, e Krai Iesusin angazangarim ko gavgavir ekiam sara izamin dughiam bagha mizuai. An en Godin Gavgavim ko en Akurvazir Gumazim. Krai kamaghin ifonge, a uam e iniva egh a en arazir kuraba adangasa. Eghti e bar zuegh an gumamazizibar min ikiam. Egh e arazir aghuibar dar amusi bar ifongegham. Bizir kam bagha, a uabi uan mikarzim anigha, areme.

Kar Godin Akam.

WELKAMIM GUTNIUS

Aleluia, Aleluia.

Datirighin Krai en Ekiam an otozi, ki bar akongezir akam ia bagh a inigha izi.

Aleluia.

GUTNIUS

Lu 2:1-14

Akar dapanim: Dughiar kamin, Devitin nguibamin, amizir mam borim bate. Ezi borir kam, bar moghira ua ia iniam.

Ia, Krai Iesusin Akar Aghuir Luk osirizim, a baragh

Ezi dughiar kam Sisar Ogastus akar gavgavim amadagha ghaze, "Rom garir nguibabar gumamaziziba bar mangi uan ziaba osir." Dughiar kam Kwirinius, a Sirian gumazir dapanimin itima, ziaba osirir dughiar faragha zuir kam oto.* Ezi gumamaziziba uan ziaba osirasa uan nguibabara zui. Ezi Josep uaghan Devitin anabar mam. Kamaghin a Galilin Distrighin itir nguibam Nasaret ategha, Judian Distrighin itir nguibam Betlehemin zui, kar Devitin nguibam. A mangiva uan amuir inabazim Maria ko

aning uan ziamning osirasa. Dughiar kam Maria borimin navim adai. Egha aning ghuava Betlehemin itima, Maria borim batamin dughiam oto. Ezi a uan otarir ivariam bate. Egha borim inir avizibar a nomke. Dughiar kam dipenir akuim izifa. Kamaghin amizi, aning borim isava bulmakauba apir danganimin aneti.

Ezi sipsipbar garir gumazir maba nguibamin azenan ikiava, dimagaribar uan sipsipbar gara me geghufi. Ezi Ekiamin enselin mam pura me batozi,

Ekiamin angazangarim me gisira. Ezi me bar atiatingi. Ezi ensel kamaghin me migei, "Ia atiatingan marki. Ia oragh! Ki akar aghuim inigha ia bagha izi. Akar aghuir gumamaziziba bar me damighti, me bar akongegham. Datirighin Devitin nguibamin akurvazir gumazim ia bagha oto. A God Ua Gumamaziziba Iniasa Misevezir Gumazim, a en Ekiam. Ia mangi kamaghin ganigh fogh, ia gantima me borim inir avizibar a nomkeghiva

bulmakauba apir danganim datightima a irighiv ikiam." Ezi maghira, Godin nguibamin enselin avirir bar dafam otogha enselin kam ko me Godin ziam fa kamaghin migei,

"Ia bizibar pin itir Godin ziam fi. Eghti nguazimin itir gumaziba ko amizir God ifongeziba, me navir amirizimin iki."

Kar, Krais Iesusin Akar Aghuim.

1. RIT

Ais 62:11-12

Akar dapanim: Gumazir uam e iniam, an otogha gifa.

Akar kam, Godin akam inigha izir gumazim Aisaia, an osiri.

Ia oragh! Ikiavira Itir God, kamaghin nguazir kamin gumamaziziba bar gun me mikemegha ghaze,
"Ia Saionin nguibamin gumamaziziba bagh mangi kamaghin me mikim suam, 'Ia gan, ian Akurvazir Gumazim, a izi!
A faragha midorozim gamua apanibagh afiragha, gumamaziziba bizir aghuibar min me inizi me a ko izi.'

Me gumamazizir kaba kamaghin me diponam, 'God baghavira itir gumamaziziba,' ko 'Ikiavira Itir God, ua inizir gumamaziziba.'
Egh me kamaghin ian nguibam diponam, 'Nguibar God bar ifongezim,' ko
'Nguibar ekiar God ua izegha itim.'

Kar Godin Akam.

SAM

Sam 97:1, 6, 11-12

Ia akam ikaragh: Datirighin angazangarir mam oto, egha a en Ekiam.

Ikiavira Itir God, an atrivimin iti.
Nguazimin itir gumamaziziba, ia bar akueghti, gumamazizir arighatizibar itiba ia dimiva bar akongegh. Overiam uabi, kamaghin akam akura ghaze, "God arazir aghuibarama ami."
Ezi gumamaziziba bar an angazangarim ko gavgavimin gari.

Bekim:

God angazangarim isa gumamazizir aghuibagh aniga, me gamizi men naviba bar akongegh.
Gumamazizir aghuiba, ia bizir Ikiavira Itir God amiba bagh, bar akongegh.
Ia bizir kabagh nighnigh a minabagh.
Ia an ziar zuezir aghuim ginighnigh, a pirafi.

Bekim:

2. RIT**Ta 3:4-7***Akar dapanim: A uan apangkuvimin a uam e ini.***Akar kam, akinafarir Pol Taitas baghava an osirizimin aven iti.**

Ezi God, en Akurvazir Gumazim, a bar e gifonge, egha en apangkuvigha arazir aghuimin e gami. Ezi dughiar an arazir kam azenim girizi, an en akura. An en arazir aghuir e uari amizibagh nighnizir puvati, egha en akura. Puvati. An apangkuvimra, an en akura. An e rue, ezi tuavir kamin a en akura. Dughiar kamin a uan Duam e ganingizi, ezi an Duam e gamizi, e an borir bar igiabar min otifi. Krai Iesus, a Gumazir

en Akurvazim, an ingangarimin God uan Duamin gavgavir aviriba bar e ginge. God kamaghin ifonge, Krai en apangkuvigha e gamima e Godin damazimin gumamazizir aghuibar otifi. E an boribagh ava, egh gin bizir aghuir an e bagha inabaziba iniam. Kamaghin e ikirimirir aghuir an e bagha inabazim mizuai iti.

Kar Godin Akam.**WELKAMIM GUTNIUS***Aleluia, Aleluia.*

Godin iziam overiamin bar pin iti, ezi God nguazimin itir gumamaziziba bar me gifonge.

*Aleluia.***GUTNIUS****Lu 2:15-20**

Akar dapanim: Sipsipbar garir gumaziba, me Maria ko Josep gari, aning iti. Ezi borim bulmakauba dagheba apir danganim girighav iti.

Ia, Krai Iesusin Akar Aghuir Luk osirizim, a baragh

Ezi enselba sipsipbar garir gumaziba ategha Godin nguibamin ghuezima, ezi sipsipbar garir gumaziba uarira uariv gei, "Aria, e Betlehem mangiva Ekiam e mikemezir bizir otozimin ganika." Egha me zuamira ghuava Josep ko Marian api, egha borimin garima a bulmakauba apir danganim girighav iti. Egha sipsipbar garir gumaziba borimin ganigha, egha ensel borimin gun me mikemezir akabar gun gumazir igharazibav gei.

Ezi gumamaziziba sipsipbar garir gumazibar eghaghanim baregha digavir kuram gami. Ezi Maria bizir kaba uan navir averiam gatigha, egha dagh nighnighavira iti. Ezi sipsipbar garir gumaziba uamatenge. Ensel me mikemezi me oraghizi moghin bizibar gari, da otifi. Kamaghin me bar akuegha Godin ziam fa zui.

Kar, Krai Iesusin Akar Aghuim.**1. RIT****Ais 52:7-10**

Akar dapanim: En God, uan gumamaziziba ua me iniam, eghti nguazimin gumamaziziba bar an ganam.

Akar kam, Godin akam inigha izir gumazim Aisaia, an osiri.

Godin akar aghuim inigha izir gumazimin darorim, a bar dera. A mighsiar nguibabar ikegh akar aghuim inigh izi Jerusalemin

aven mangi, kamaghin mikim suam,
"Ia dabirabir aghuim ko navir amirizimin iki!"

Bizir bar aghuiba ia bativam,
 God ian akurvaghti ia deravira
 ikiam.
 Eghti ia Saionin gumazamiziba, ian
 God, an atrivimin ikiam.”
 Eghti gumazamiziba akam inigha
 izir gumazimin gansi bar
 akuegham.
 Ia oragh. Ian gumazir nguibar
 ekiamin bizibar gariba,
 uari uan damazibar ganti, Ikiavira
 Itir God uamategh Saionin
 nguibamin izam,
 eghti me bar akuegh pamten
 dimiva arangam.
 Ia Jerusalemin nguibamin itir
 gumazamizir me asighasighizir
 maba,

ia kamaghin fogh, Ikiavira Itir God
 uan gumazamizibar osimtiziba
 agivagha gavgavim isa me
 ganingi.
 A Jerusalemin nguibamin itir
 gumazamiziba ua me ini.
 Kamaghin amizi ia bar akuegh
 pamten dimiva onger akabar
 amu.
 Ikiavira Itir God uan gavgavim,
 kantribar gumazamiziba an
 ganasa, anakagha gifa.
 Eghti a uan gumazamizibar
 akuragha ua me inizir gavgavir
 ekiam, nguazimin gumazamiziba
 bar an ganam.

Kar Godin Akam.

SAM

Sam 98:1, 2-3, 3-4, 5-6

Ia akam ikaragh: Gumazamiziba bar, Godin apangkuvir ingangarimin ganigha gifa.

Ia onger akar igiatam Ikiavira Itir God bagh, a bangi.
 A uan agharimin bizir aghuir igharagha garibagh ami.
 A uan gavgavir ekiamin amodoghin, midorozir kam gamua apaniba abira.

Bekim:

Ikiavira Itir God, apaniba ko misogha me abirazir bizimin gun mikeme,
 a uan akurvazir arazim isa gumazamizibar akazi me bar an gari.
 A Israelian apangkuvigha men akuraghasa dikirizir akar kam ginighnighavira
 ikia, me ataghizir puvati.
 Kantribar gumazamiziba Godin gari, an apaniba ko misogha me abiragha, uam e
 ini.

Bekim:

A Israelian apangkuvigha men akuraghasa dikirizir akar kam ginighnighavira
 ikia, me ataghizir puvati.
 Kantribar gumazamiziba Godin gari, an apaniba ko misogha me abiragha, uam e
 ini.
 Nguazimin gumazamiziba, ia Ikiavira Itir God bagh bar akongezir ighiabar amu.
 Ia onger akaba pamten dar amuva bar akuegh an ziam fi.

Bekim:

Ia gitabav sogh, Ikiavira Itir God bagh ighiabar amu.
 Ia boabav soghti, dar arareba bar deragh.
 Ia sighaba, ko itabagh iviva,
 pamten dimiva Ikiavira Itir Godin ziam fi, a en atrivim.

Bekim:

2. RIT**Hi 1:1-6**

Akar dapanim: Datirighin dughiar kamin, God e mikimasa uan akam isa uan Otarim ganingi.

Akar kam, a Hibrun akinafarimin aven iti.

Fomira God dughiar aviriba ko tuavir aviribar uan akam isa an akam inigha izir gumazibagh aningizi, me en inazir afeziabav keme. Ezi datirighin dughiar kam, kar dughiar abuananaba, God e mikimasa uan akam isa uan Otarim ganingi. God biziba bar da iniasava Otarir kam a misefe. Otarir kamin agharimin, God fomira overiam ko nguazimin ingari. Ezi Otarir kamra Godin angazangarim en akagha ghaze, God a bar dera. Egha uaghan a Godin mirara gari. An akam bar gavgafi, egha akar kamra a bar bizibagh amima, da gavgavighavira iti. Egha an arazir kuraba gin amadir ingangarim a givagha, egha gumazamizibagh amima me zuegha iti. Egha a gin Godin Nguibamin ghuavanaboghava Pin

Tir Atrivir Ekiamin agharir guvimin boroghin apera.

Afeziam ziam uan Otarim ganingi. Ezi ziar kam a bar dera, egha enselbar ziam gafira. Ezi kamaghin an Otarim gamizima a enselbar ekiamin oto, ezi me an apengan iti. Egha God dughiatam uan enselin tam kamaghin a mikemezir puvati, "Ni nan Otarim, ezi datirighin ki nin Afeziam." O a enselin tamin mikemezir puvati, "Ki an Afeziam, ezi a nan Otarim." Bar puvati. Egha dughiar God ua uan Otarir ivariam nguazir kamin anemangasa egha uaghan ghaze, "Godin enselba bar an apengan ikiva egh an ziam fam."

Kar Godin Akam.**WELKAMIM GUTNIUS**

Aleluia, Aleluia.

Datirighin angazangarir bar ekiam nguazimin oto. Ezi gumazamiziba bar izi Ekiamin iziam f.
Aleluia.

GUTNIUS (longpela Rit)**Jo 1:1-18**

Akar dapanim: Akam, a gumazimin min oto, egha a iza en tongin iti. Ezi e an iziar ekiam ko gavgavimin ganigha gifa.

Ia, Krais Iesusin Akar Aghuir Jon osirizim, a baragh.

Bar fomira fomira, biziba bar tighar otivamin dughiam, Akam iti. Akar kam God ko iti, egha a uabi God. Bar fomira fomira Akam God ko iti.

Ezi Akar kamin, God biziba bar dar ingarizima, da otifi. Ezi bizitam tuavir igharazi tamin otozir puvati. Akam uabi bizibagh amizima, da otifi. Egha Akar kamra, a zurara itir ikirimirir aghuarimin mingarim. Ezi ikirimirir aghuarir kam, a uaghan gumazamiziba angazangarim me ganidi. Ezi angazangarir kam a mitatemin

isima, mitatem anevaraghava egha anemungezir puvati.

Ezi God gumazir mam amada, an ziam Jon. An akam akunasa ize. An angazangarir kamin akamin gun mikimtima, gumazamiziba bar moghira a baraghiva egh nighnizir gavgavim an ikiam. A ingangarir kam damuasa ize. Egha Jon uabi angazangarir kam puvati. An angazangarir kamin akamin gun mikimasa ize. Ezi angazangarir kam guizbangin angazangarim. Egha

nguazir kamin izegha gumamaziziba bar angazangarim me ganidi.

Akam nguazir kamin iti. An gavgavimin, God nguazir kamin ingari, ezi nguazimin itir gumamaziziba a gifozir puvati. A uan nguibamra ghuzima an anababa an aghuagha a inizir puvati. Ezi gumamazizir maba a ini, egha nighnizir gavgavim an ziamin iti. Kamaghin amizi, a me gamizima me Godin boribar min otifi. Me amebaba ko afeziabar ghuzibar otifi, o mikarzarbar ifongiamin, o gumazimin ifongiamin Godin boribar otivizir puvati. Bar puvati. God uabi me gamizima me an boribar otifi.

Akam uabi gumazimin min oto. A bar Godin Otarir vamira, ezi God a gamizi a Godin gavgavim ko angazangarim ini. Ezi God anemadazima an en tongin iti. Ezi e an gavgavim ko angazangarimin gani.

Ezi apangkuvim ko guizin akam bar a gizifa.

Ezi Jon gumazir kamin gun me migei. Egha pamten dia ghaze, "A gumazir kam, ki faragha an gun ia mikemegha gifa. Ki kamaghin migei, 'Gumazir nan gin izim, a bar fomira iti, ezi nan amebam gin na bate. Kamaghin amizi, an gavgavim bar nan gavgavim gafira.' " Ezi apangkuvim bar a gizifa, ezi a uan apangkuvimin a dughiar aviribar bar deravira e gami. Guizbangira, Moses Osirizir Araziba, God e bagha da isa Moses ganingizi, ezi Moses e ganingi. Ezi God, Krais Iesusin aven apangkuvim ko guizbangin arazim en aka. Gumazitam bar Godin ganizir puvati. Ezi kar Godin Otarir vamira, a uabi God, egha a bar Godin boroghira iti. A uabira God en aka.

Kar, Krais Iesusin Akar Aghuim.

GUTNIUS (sotpela Rit)

Jo 1:1-5, 9-14

Akar dapanim: Akam, a gumazimin min oto, egha a iza en tongin iti. Ezi e an iziar ekiam ko gavgavimin ganigha gifa.

Ia, Krais Iesusin Akar Aghuir Jon osirizim, a baragh.

Bar fomira fomira, biziba bar tighar otivamin dughiam, Akam iti. Akar kam God ko iti, egha a uabi God. Bar fomira fomira Akam God ko iti.

Ezi Akar kamin, God biziba bar dar ingarizima, da otifi. Ezi bizitam tuavir igharazi tamin otozir puvati. Akam uabi bizibagh amizima, da otifi. Egha Akar kamra, a zurara itir ikirimirir aghuarimin mingarim. Ezi ikirimirir aghuarir kam, a uaghan gumamaziziba angazangarim me ganidi. Ezi angazangarir kam a mitatemin isima, mitatem anevaraghava egha anemungezir puvati.

Ezi angazangarir kam guizbangin angazangarim. Egha nguazir kamin izegha gumamaziziba bar angazangarim me ganidi.

Akam nguazir kamin iti. An gavgavimin, God nguazir kamin ingari, ezi nguazimin itir gumamaziziba

a gifozir puvati. A uan nguibamra ghuzima an anababa an aghuagha a inizir puvati. Ezi gumamazizir maba a ini, egha nighnizir gavgavim an ziamin iti. Kamaghin amizi, a me gamizima me Godin boribar min otifi. Me amebaba ko afeziabar ghuzibar otifi, o mikarzarbar ifongiamin, o gumazimin ifongiamin Godin boribar otivizir puvati. Bar puvati. God uabi me gamizima me an boribar otifi.

Akam uabi gumazimin min oto. A bar Godin Otarir vamira, ezi God a gamizi a Godin gavgavim ko angazangarim ini. Ezi God anemadazima an en tongin iti. Ezi e an gavgavim ko angazangarimin gani. Ezi apangkuvim ko guizin akam bar a gizifa.

Kar, Krais Iesusin Akar Aghuim.

PESTODE BILONG HOLI FAMILI

(Sapos ol i laik, ol i ken kisim Rit 1 na 2 na Sam bilong Yia A bilong senisim Rit na Sam i stap hia)

1. RIT

1 Sml 1:20-22, 24-28

Akar dapanim: Ki Samuel isi Ekiam daningasa. Eghti a Ekiamin ingangarim zurarama a damuam.

Akar kam, akinafarir faragha zuim, Samuel osirizimin aven iti.

Ezi dughiar mong otevimin gin Hana navim asangi, egha otarim bate. Egha ghaze, “Ki Ikiavira Itir Godin azarazima a borir kam na ganingi. Ezi ki ziam Samuel a gati.”

Arazir kamin gin, Elkana ko an dipenimin itir darazi, Silon nguibamin mavanang egh azenibar vaghvagha me ofa gami moghira damuasa. Egh a uaghan Ikiavira Itir God, ko dikirizir akam bagh ofa damuam. Ezi Hana me ko zuir puvatigha kamaghin uan pam migei, “Borim tong ekevegh givagh otem ateghti, ki a inigh Ikiavira Itir God, daningam. Eghti a Ikiavira Itir Godin Dipenimin iki mamaghira ikiam.”

Ezi gin borim otem ategha givazi, Hana a inigha, bizir kaba sara inigha Ikiavira Itir God bagh ofa damuasa Silon nguibamin itir Purirpenimin ghuavanadi. Bizir kaba: Bulmakaun

apurir igiar 3plan azeniba itim ko, 10 kilogram plaua ko, beghiar me memen inimin isamizim, wainin dipam a gurizi an an iti, a bizir kaba inigha Ikiavira Itir Godin Purirpenimin zui. Me otogha givagha, bulmakaun apurir igiar kam misuegha givagha, otarim inigha Eli bagha zui. Egha Hana kamaghin Eli migei, “O, nan gumazir aruam, ni na gifoghavira iti, o puvati? Ki amizir kam, faragha nin boroghin kagh tughav ikia Ikiavira Itir God ko migei. Ki otarir kam uabi daningasa Ikiavira Itir God ko migia an azangsis, ezi a nan azangsizim ikara. Kamaghin, ki a isa Ikiavira Itir God ganidi. Eghti an ikirimirim zurara Ikiavira Itir God baghvira iki an ingangarim damuam.” Egha me dapaniba avigha Ikiavira Itir Godin iziam fe.

Kar Godin Akam.

SAM

Sam 84:2-3, 5-6, 9-10

Ia akam ikaragh: Ekiam, gumazamizir nin Dipenimin itiba, me bar akongegh.

O Ikiavira Itir God, ni Godin Gavgavir Bar Ekiam Itim.

Nin dipenim a bar moghira dera.

Nan navir averiamin, ki nin dipenim dughia bar zurara gumaziba uari akuvi naghin aven ikiasa.

Nan ifongiam kamakin, ki nin dipenim bar a gifonge.

Ni Godin angamra itim.

Ki uan mikarzim ko nighnizim sara, ni bagh bar akuegh, ighiabar amuam.

Ia akam ikaragh: Ekiam, gumazamizir nin Dipenimin itiba, me bar akongegh.

Nin Dipenimin aven itir darasi,
men naviba deragha bar akonge,
me zurara nin ziam fava ighiaba bati.

(Ighiam gamua an suiam atugha avughsegha ua ighiam gami.)

Gumamazizir nin gavgavim iniasa amiba,
me ni bagha Saionin mighsiamin mangasa ifongeziba, me bar akongegh.

Ia akam ikaragh: Ekiam, gumamazizir nin Dipenimin itiba, me bar akongegh.

O Ikiavira Itir God, ni Jekopin God.

Ni Godin gavgavir ekiam itim,
ni nan azangsizim barakigh.

(Ighiam gamua an suiam atugha avughseghe ua ighiam gami.)

O God, ni en atrivimin gan, deragh a damu.

A uabi oramin min e moga, deravira e geghufi.

Ni uabi ua bagh a ginabazi, an atrivimin iti.

Ni deraviram a damu.

Ia akam ikaragh: Ekiam, gumamazizir nin Dipenimin itiba, me bar akongegh.

2. RIT

1 Jo 3:1-2, 21-24

Akar dapanim: An e dibora ghaze, e Godin boriba. Ezi bar guizbangira, e Godin boribar min iti.

Akar kam, akinafarir faragha zuim, Jon an osirizimin aven iti.

Ia nighnigh, Afeziar Ekiam bar
e gifuegha en dighorim gami. Egha
ziar kam, Godin boriba, e gati. Ezi
guizbangira, e an boribara. Nguazir
kamin gumamaziziba God gifozir
puvati, me kamaghin uaghan e gifozir
puvati. Nan adarasi, e datirighin
Godin boriba. Egha e fozir puvati, e
gin manmaghin otivam. God bizir kam
tighar en akagham. E kamaghin fo,
Krais uamategh nguazir kamin iziti, e
uan damazibar deravira an ganam. Egh
an min otogham.

Nan adarasi, en navir averiaba
kamaghin mikiman koghan suam,

ia ikufi, eghti e Godin damazimin
atiatingan kogham. E Godin arazibar
gin mangiva a ifongezir arazibar
amuva, kamaghin e bizitam bagh an
azangsighti, an e daningam. Kar an
akar ekiam: e nighnizir gavgavim
an Otirim Krais Iesusin iki. Egh an
e mikemezir moghin, e uari uarigh
ifuegham. Tina an akamin gin mangiva
a Godin poroghiv ikiti, God an poroghiv
ikiam. God uan Duam e ganingizi, ezi
an Duar kam en akazi, e fo, God e ko iti.

Kar Godin Akam

WELKAMIM GUTNIUS

Aleluia, Aleluia.

Ekiam, ni en navibagh iraghti e nin otarimin akam kuariba arigh a baragham.

Aleluia.

GUTNIUS

Lu 2:41-52

*Akar dapanim: Amebam ko afeziam a buria ghua gin Godin Dipenir miriamin an api. A
Judabar tisabar torimin aperaghav iti.*

Ia, Krais Iesusin Akar Aghuir Luk osirizim, a baragh.

Azeniba zurara Iesusin amebam
ko afeziam, God Israelbagh Itazir
Dughiamin Isam bagha Jerusalem
zui. Ezi an azenir 12 plan otogha,

arazim mirara me isam bagha zui.
Isam givazima, an gin, an amebam ko
afeziam uamategha nguibamin zuima,
aningin otarim Iesus, a Jerusalemra

itima aning a gifozir puvati. Aning ghaze, a ti uan namakaba ko izi. Egha aruer kamin ghuavira iti. Egha aning maghira uan namakaba koma anababar torimin a bagha rui. Egha aning an apizir puvati, egha aning a bagh ruiasa uamategha Jerusalemin zui. Dughiar mikezimin gin aning Godin Dipenimin avizimin an api. A tisabar torimin aperaghav iti, egha me baregha azangsizibar me gami. Gumazir kaba bar an fofozim ko akar ikarvazir kaba baregha egha digavir kuram gami. Ezi an amebam ko afeziam an apigha, egha digavir kuram gami. Egha an amebam kamaghin a migei, “Nan otarim, ni

tizim bagha arazir kurar kamin ga gami? Ga ni bagha bar osemegha ni buri.” Ezi a kamaghin aning azara, “Gua tizim bagha na buri? Gua ti fozir puvati, ki uan Afeziamin Dipenimin aven ikiam?” Ezi an aning migeir bizimin mingarim aning a gifozir puvati. Egha a aning akam baregha aning ko Nasaretin uaghiri. Ezi an amebam bizir kaba baregha dagh nighnighavira iti. Ezi Iesus fofozim ko mikarzim sarama aghui. Ezi an araziba God koma gumazibagh amima, me a gifonge.

Kar, Krais Iesusin Akar Aghuim.

1. JANUARI: MARIA, MAMA BILONG GOD

1. RIT

Nam 6:22-27

Akar dapanim: Me nan iziam diponam, egh ki Israelia deraghvira me damusi, me nan azangsigham.

Akar kam, Israelian Dibobonimin Akinafarim, o Namba, an aven iti.

Ikavira Itir God kamaghin Moses migei, “Ni Aron uan otariba ko, nan arazir ki deragh Israelia damuamim an gun me mikim. Me kamaghin Israelia mikim, ‘Ikiavira Itir God, deraghvira ia damuva egh deraghvira ian ganam. Ikiavira Itir God, ian apangkuv egh, mati an guamin angazangarim ia gisirazi moghin, deraghvira ian ganam.

Egh Ikiavira Itir God, navir aghuim ian iki, egh ia damuti ian dabirabim deragham.’ Eghti arazir kamin me nan ziam dipon egh suam, Ikiavira Itir God, deraghvira Israelia damu. Eghti ki bar deraghvira me damuam.”

Kar Godin Akam.

SAM

Sam 67:2-3, 5, 6, 8

Ia akam ikaragh: God ni en apangkuvigh deravirama e damu.

God, e kamaghin nin azai, ni deraghvira e damuva en apangkuv
Mati nin angazangarim e gisirazi moghin,
ni ragh en gan en akurvagh.

(Ighiam gamua an suiam atugha avughsegha ua ighiam gami.)

Eghti nguazimin gumamaziziba ganigh nin arazibagh fogham.

Me kamaghin fogham, ni gavgavir bar ekiam ikia men akurvasi.

Ia akam ikaragh: God ni en apangkuvigh deravirama e damu.

Ni gumamazizibar araziba guizbangira da tuisigha, tuavir aghuim men akazi, me
nin ifongiamin girara zui.

Kamaghin, gumamazizibar naviba bar akueghiva, ighiaba bangi nin ziam fam.

(Ighiam gamua an suiam atugha avughsegha ua ighiam gami.)

Ia akam ikaragh: God ni en apangkuvigh deravirama e damu.

O God, nan ifongiam, gumamaziziba bar ni gifuegh nin ziam fi, nin ziar ekiam
pirafam. Bar guizbangira, God deragha e gami.

Nguazimin gumamaziziba bar an atiating an apengan iki.

Ia akam ikaragh: God ni en apangkuvigh deravirama e damu.

2. RIT

Ga 4:4-7

Akar dapanim: Dughiar God inabazimra, a uan Borim amadazima, a ize. Ezi amizim a bate.

Akar kam, akinafarir Pol Galesian gumamaziziba baghava an osirizimin aven iti.

Ezi God kamaghin ifonge, e an boribar otivasa, egha Moses Osirizir Arazibar apengan itir gumamaziziba, a uam e givezasa. God fomira e givezasa

dughiam ginaba. Ezi dughiar a fomira inabazim datirighin otozi, ezi a uan otarim amadazima a ize. Ezi amizim a bate. Ezi a gumazir Moses Osirizir

Arazibar apengan itimin min oto. Ezi e Moses Osirizir Arazibar apengan itir gumazamiziba, a ua e ini. Ezi ia datirighin Godin boribagh ava. Ezima God uan Otarimin Duam amadazima an en navir averiabar iti. Ezi Duar kam en aven kamaghin dei, "O Ame!

Nan afeziam." Kamaghin, ni ua pura ingangarir gumazir kinimin itir puvati. God ni gamizi ni an borim gava. Egh ni fogh, ni an bizir aghuir inabaziba iniam.

Kar Godin Akam.

WELKAMIM GUTNIUS

Aleluia, Aleluia.

Fomira God uan akam, akam inigha izir gumazibar akatorimin en inazir afeziaba me keme. Ezi datirighin a uan akam uan otarimin aktorimin e migei.

Aleluia.

GUTNIUS

Lu 2:16-21

Akar dapanim: Sipsibar garir gumaziba, Maria ko Josepin gari, aning iti. Ezi borim bulmakauba dagheba apir danganim girighav iti. Ezi amebam otezir dughiamin gin aruer namba 8 otozi, me ziam Iesus a gat.

Ia, Krais Iesusin Akar Aghuir Luk osirizim, a baragh.

Egha me zuamira ghuava Josep ko Marian api, egha borimin garima a bulmakauba apir danganim girighav iti. Egha sipsipbar garir gumaziba borimin ganigha, egha ensel borimin gun me mikemezir akabar gun gumazir igharazibav gei. Ezi gumazamiziba sipsipbar garir gumazibar eghaghanim baregha digavir kuram gami. Ezi Maria bizir kaba uan navir averiam gatigha, egha dagh nighnighavira iti. Ezi

sipsipbar garir gumaziba uamatenge. Ensel me mikemezi me oraghizi moghin bizibar gari, da otifi. Kamaghin me bar akuegha Godin ziam fa zui.

Ezi 7 plan dughiaaba givazima an mikarzir mogomem aghoramin dughiam otozi me ziam Iesus a gati. Maria tighar navim asangam, ensel faragha a gatizir ziam.

Kar, Krais Iesusin Akar Aghuim.

PESTODE BILONG EPIFANI

1. RIT

Ais 60:1-6

Akar dapanim: Ki ian Ekiam, nan anzangarim ko gavgavim, ian gara ia gisira.

Akar kam, Godin akam inigha izir gumazim Aisaia, an osiri.

Ikiavira Itir God kamaghin migia
ghaze:
O Jerusalem, ki Ikiavira Itir God,
nan gavgavir ekiam otogha
angazangarimin min ni gisira.
Nan ziar ekiam oto, mati aminim
tirazi aruem anadi moghin.
Kamaghin, ni dikavigh aruemin min
isiragh.
Ni gan, ghuariar piziba nguazir kamin
danganiba bar da avara.
Mitater kuram, kantriba bar da
modi.
Eghti Ikiavira Itir God otogh an
angazangarir gavgavim ni bagh
izi,
egh ni gisiraghti gumamaziziba an
ganam.
Eghti kantrin igharazibar
gumamaziziba nin angazangarir
kamin ganigh, egh ni bagh izam.
Eghti atriviba uaghan nin
angazangarir ekiam kamin ganigh,
egh me dikavigh ni bagh izam.
Ni kogh pin tintinibar ganti, nin
gumamaziziba uari akuvagh ni
bagh izam.

Nin otariba nguibar saghuiabar
ikegh me ko daru izam.
Eghti kantrin igharazibar
gumamaziziba nin guiviba isi
uan ghuribagh afegh, mati men
ameboghfeziaba me afegh, egh
me inigh izam.
Eghti ni bizir kamin ganigh, nin guam
angazangarimin min taghtaghti,
nin navir averiam bar moghiram
akuegham.
Guizbangira, kurir ekiaba, bizir
aghuir aviriba inigh ongarim
abigh ni bagh izam,
eghti ni dagiaba ko bizir aghuiba
nguazir kamin kantriba dama da
iniam.
Midian kantri ko Efan kantri, aningin
gumamaziziba, uan kamelin
aviriba inighti, da bizir aghuir
aviriba ater ni bagh izam.
Egh uaghan Seban kantrin golba ko
pauran mughuriar aghuim zuiba
inigh ni bagh izam.
Ki Ikiavira Itir God, me tuavimin izi
nan iziar ekiam fam.

Kar Godin Akam.

SAM

Sam 72:1-2, 7-8, 10-13

Ia akam ikaragh: Ekiam, nguazimin kantriba bar moghira nin iziam fam.

O God, ni atrivim uan arazir aghuiba, deravirama a geghan.
Eghti a kotin aven deragh gumamaziziba tuisigham.
Nin kotiar araziba, da bar guizbangira zui,
egh ni atrivir kamin akuraghti an kotiar araziba guizbangira mangi.
Eghti a nin gumamaziziba ko gumazir onganarazibagh amiba,
an arazir aghuimra, me gativagh,
guizin arazimin gin mangi men araziba tuighsigham.

Ia akam ikaragh: Ekiam, nguazimin kantriba bar moghira nin iziam fam.

A ikivira ikiamin dughiar kam, gumamaziziba arazir aghuimra gin mangam.
Iakinim isiraghavira itir dughiamin, dabirabir aghuim otiv mangivira ikiam.

An atrivimin iki gumazamizir ongarimin roghira itiba ko saghon itiba, me gativagh men ganam.

Eghti an nguazir oteviba, Yufretisin dipamin ikegh mangi nguazir kam bar an mangam.

Ia akam ikaragh: Ekiam, nguazimin kantriba bar moghira nin iziam fam.

Spenin kantrin atriviba ko arighatizibar atriviba, me bizir aghuiba a daningam.

Uaghan, Seban kantri ko, Arabian kantrin atriviba, me a bagh takisba inigh izam.

Atriviba bar izi a bagh teviba apiram.

Eghti kantriba bar, dar gumazamiziba an ingangaribar amuam.

Ia akam ikaragh: Ekiam, nguazimin kantriba bar moghira nin iziam fam.

Guizbangira, an onganarazibagh amir gumazibar dimdiaba baregha men akurvasi.

Gumazir onganarazibagh amua ikia akurvaziba men puvatiziba, a uabi men akurvasi.

Gumazir onganarazibagh amua gavgaviba puvatiziba, a men apangkufi.

Gumazir biziba puvatiziba a ua me isi.

Ia akam ikaragh: Ekiam, nguazimin kantriba bar moghira nin iziam fam.

2. RIT

Ef 3:2-3a, 5-6

Akar dapanim: Ia akar aghuir kamin, ia ikizir igharazibar gumazamiziba, ia e ko uari inigha ikizir vamira ko mikarzir vamiran otifi.

Akar kam, akinafarir Pol Efesusin gumazamiziba baghava an osirizimin aven iti.

Ia ti oreghama, God apangkuvim ikia ia bagha ingangarir kam na ganingi. Egha God uan nighnizir mogomem azenan aneka, egha na gamizi, ki a gifo. Ki mong an gun osiri,

Faragha zuir dughiaba, God gumazamiziba nighnizir mogomer kamin me mikemezir puvati. Ezi datirighin God uan Duamin tuavimin uan aposelin a baghavira itiba ko an akam inigha izir gumazibar akazi an

azenim giri. Nighnizir mogomer kam a kamakin: Akar aghuimin aven Kantrin Igharazibar Gumaziba ko Judaba uaghara, God uan bizir aghuiba isa bar moghira me ganidi. Me uari ko ikia mati nivafizir vamiran aven iti. Me bar moghira, Krai Iesusin ingangarimin tuavimin, bizir God e bagha akam akiriziba e da iniam.

Kar Godin Akam.

WELKAMIM GUTNIUS

Aleluia, Aleluia.

E Ekiamin mikovezim aruem anadi naghin an ganigha, an iziam fasa izi.

Aleluia.

GUTNIUS**Mt 2:1-12**

Akar dapanim: E aruem anadi naghin Ekiamin mikovezimin ganigha egha an iziam fasa izi.

Ia, Krais Iesusin Akar Aghuir Matyu osirizim, a baragh.

Maria Distrigh Judian aven itir nguibam Betlehemin Iesus bate. Dughiar kamin Herot, Atrivimin iti. Amebam Iesus batezima fofozir gumazir maba aruem anadi naghin ikegha Jerusalem in ize.* Egha me kamaghin azai, “Borir Judabar Atrivimin ikiamim, amebam a batezi a managh iti? E an gun migeir mikovezim aruem anadi naghin an ganigha an ziam fasa izi.” Ezi Herot akar kam baregha an dighorim a bira. Ezi Jerusalem in itir darazi uaghan kamaghin ami. Egha Herot ofa gamir gumazir ekiaba ko Judan arazibagh fozir gumazibar diagha me akuvagha kamaghin men azai, “God Uam E Iniasa Misevezir Gumazim, an amebam managh a batam?” Ezi me ghaze, “Judian Distrighin aven itir nguibam Betlehem in, an amebam a batam. E bizir kam kamaghin a gifo, God in akam inigha izir gumazimin osizirim kamaghin iti,

‘Ni Betlehem, ni Judan nguazimin aven iti.

Ni Judabar nguibar ekiabar tongin uaghan ziam iti, nin aven atrivir ekiatam azenim giram,

egh a nan gumazamiziba Israelbagh ativagham.’ ”

Ezi Herot averara aruem anadi naghin izezir gumazibar diagha mikovezim otozir dughiam bagha men azai. A me faraghavira mikovezimin apizir dughiam gifogha, egha me isa Betlehem in me amadagha kamaghin me migei, “Ia mangi borim bativsi deraghvira rui. Ia a batoghiva ua na bagh migirigiam amadagh. Eghti ki uaghan mangi, an ziam fam.”

Me Herot baregha zuima mikovezir me faragha aruem anadi naghin ganizim, men faragha ghua borim itir danganim batogha a gisirara iti.* Me mikovezimin ganigha bar akonge. Egha me dipenimin aven ghua borim bato, a uan amebam Maria ko. Me tevibar pirigha avigha ghuaghira borimin ziam fe. Egha me uan mitariba kuigha bizir aghuir a bagha inigha izezibar an ekarim gami. Me gol ko mughuriar aghuim itir borek ko avir migharir muguriar aghuim gamim da isava a ganingi.

Ezi God irebamin me batogha Herot bagh ua mangan me anogoroke. Ezi me tuavir igharazimin uamategha uan nguibamin ghue.

Kar, Krais Iesusin Akar Aghuim.

BAPTAIS BILONG BIKPELA JISAS KRAIS

(Sapos ol i laik, ol i ken kisim Rit 1 na 2 na Sam bilong Yia A bilong senisim Rit na Sam i stap hia)

1. RIT

Ais 40:1-5, 9-11

Akar dapanim: Ekiamin gavgavim azenan otoghtima, nguazimin gumamaziziba an ganam.

Akar kam, Godin akam inigha izir gumazim Aisaia, an osiri.

Ian God ghaze,
 “Ia gavgavim isi nan
 gumamazizibar aningti, me navir
 amirizimin iki.
 Ia apangkuvim itir akar aghuir kam
 isi, Jerusalemin nguibamin
 gumamaziziba me mikim
 gavgavim me daning.
 Egh kamaghin nan gun me mikim
 suam, ki Ikiavira Itir God, ki uan
 dafarimin men arazir kuraba
 ikaragha bar dughiar ruarimin
 me ataghizi me kalabusin ike.
 Ezi datirighin ki men mizaziba ko
 ingangarir ekiam agivagha men
 arazir kuraba gin amadazi, me
 firiaghire.”
 Ezi gumazir tiarir mam kamaghin dia
 ghaze,
 “Ia, gumaziba puvatizir
 danganimin, Ikiavira Itir God
 baghiva tuaviba azeniva dar kir.
 Egh danganir zariba apemiva,
 mighsiaba ko akiribagh kuti da
 magari.
 Egh tuavir ikiziriziba, ia dar
 ingarighti da voroghira
 mineghirigh.
 Egh tuavir ikuraba, ia deraghvira
 dar akir.
 Eghti Ikiavira Itir Godin angazangarir
 gavgavim ko iziar ekiam azenim
 girighti,

nguazir kamin gumamaziziba bar
 moghiram an ganam.”
 Kar Ikiavira Itir Godin, akatorimin
 otozir migirigiam.
 O Saionin gumamaziziba, ia mighsiar
 ekiamin mavanangiva, akar
 aghuim akun.
 O Jerusalemin gumamaziziba, ia
 pamtemin dimiva akar aghuim
 akun.
 Ni atiatingan kogh, akamin gun
 Judan nguibaba me mikim suam,
 “Ia gan, ian God a izi!”
 Ia gan. Ikiavira Itir God, ian God, a
 uan gavgavir ekiam sara izi.
 A uan apaniba dikabiragha gifa,
 egha a uan gumamaziziba,
 ua me firigha me inigha uan
 ivezimin min men akua izi.*
 A sipsipbagh eghevur gumazimin min,
 uan gumamaziziba deragha me
 geghuva men gari.
 A zurara uan agharimningin
 sipsipin nguziba akumakua
 me isa uan evarim garigha me
 ateragha rui.
 A sipsipin amebar nguzir
 bar muziariba itiba, a men
 asughasugha me isa tuaviba men
 akakagha, men akua zui.

Kar Godin Akam.

SAM

Sam 104:1-4, 24-25, 27-30

Ia akam ikaragh: Nan duam, an Ekiamin iziam fe.

Ki uan navir averiamin aven Ikiavira Itir Godin ziam fam!
 O Ikiavira Itir God, nan God, ni bar pin iti.
 Nin ziam bar pin ikia egha ni atrivir bar ekiam.
 Angazangarim ni evara, mati gumazim nim avara.
 Ni overiam atizima mikoveziba bar iti, mati gumazim purirpenim asaragha
 benimin a ikezima a iti.

Ia akam ikaragh: Nan duam, an Ekiamin iziam fe.

Ni uan dipenim dipar pin itibagh isin an ingari.
 Ezi overiamin mighariba, da mati nin karis, ezi aminim ni atera zui.
 Ni aminim amadi a nin akaba atera zui.
 Ezi overiamin onimariba ko avir mizariaba ni dagha amima, da nin ingangarir
 gumazibar iti.

Ia akam ikaragh: Nan duam, an Ekiamin iziam fe.

O Ikiavira Itir God, ni bizir bar avirimin ingari!
 Ni bar fofozir ekiam ikia bizir avirir kaba bar adar ingari.
 Ezi bizir ni ingarizir kaba, nguazim bar a gizifa.
 E munagh gari, ongarim ikia bar ekefe,
 ezi angamra ia itir bizir aviriba iti, osirir ekiaba ko doziba, ko bizir igharaziba
 an iti.
 Ezi e da mengan ibura.

Ia akam ikaragh: Nan duam, an Ekiamin iziam fe.

Angamra itir biziba bar nirara gari,
 mitiriam men azir dughiam ni dagheba me daningasa me nirara mizuai.
 Ni dagheba me ganidima me api.
 Nirara dagher aghuiba me ganidi,
 men naviba iziva egha kuatigha iti.

Ia akam ikaragh: Nan duam, an Ekiamin iziam fe.

Guizbangira, ni akirim ragha me gasarazi me atiati.
 Men angamra itir ikirimirim ni me dama a inizi me ariaghire,
 egha men mikarziba ua nguazir minemniamin oto.
 Ni ikirimirir angamra itim anidir aminim me ganingizi, me angamra iti.
 Ni nguazimin bizir igiabagh amima da otifi.

Ia akam ikaragh: Nan duam, an Ekiamin iziam fe.

2. RIT**Ta 2:11-14; 3:4-7**

Akar dapanim: An e ruezi e borir igiabar min otoifi, ezi Godin duam ikirimirir igiam e ganingi.

Akar kam, akinafarir Pol Taitas baghava an osirizimin aven iti.

E fo, Godin apangkuvim azenim girigha givazi, gumamaziziba bar an gari. God uan apangkuvir kamin en akurvasi. God uan apangkuvir kamin en sure gamua ghaze, e God aghuazir araziba ataghraghiva egh nguazir kamin arazir ifongeziba ataghragham. Egh uaghan navir ghurimin araziba dikabiniva egh arazir God ifongezir aghuibar amuasa, en sure gami. Guizbangira e nguazir kamin gumamazizibar tongin iti, ezi God uan apangkuvimin tuavimin a ifongezir arazibar gin mangasa, en sure gami. Dughiar e nguazir kamin itim, e bizir e damightima e bar akueghamim bagha mizuai. A kamakin, e Krais Iesusin angazangarim ko gavgavir ekiam sara izamin dughiam bagha mizuai. An en Godin Gavgavim ko en Akurvazir Gumazim. Krais kamaghin ifonge, a uam e iniva egh a en arazir kuraba adangasa. Eghti e bar zuegh an gumamazizibar min ikiam. Egh e arazir

aghuibar dar amusi bar ifongegham. Bizir kam bagha, a uabi uan mikarzim anigha, areme.

Ezi God, en Akurvazir Gumazim, a bar e gifonge, egha en apangkuvigha arazir aghuimin e gami. Ezi dughiar an arazir kam azenim girizi, an en akura. An en arazir aghuir e uari amizibagh nighnizir puvati, egha en akura. Puvati. An apangkuvimra, an en akura. An e rue, ezi tuavir kamin a en akura. Dughiar kamin a uan Duam e ganingizi, ezi an Duam e gamizi, e an borir bar igiabar min otifi. Krais Iesus, a Gumazir en Akurvazim, an ingangarimin God uan Duamin gavgavir aviriba bar e ginge. God kamaghin ifonge, Krais en apangkuvigha e gamima e Godin damazimin gumamazizir aghuibar otifi. E an boribagh ava, egh gin bizir aghuir an e bagha inabaziba iniam. Kamaghin e ikirimirir aghuir an e bagha inabazim mizuai iti.

Kar Godin Akam.**WELKAMIM GUTNIUS**

Aleluia, Aleluia.

Jon ghaze, 'Gumazir man a izam, and gavgavim bar na gafira, A Godin duam ko avimin ia ruam.'

Aleluia.

GUTNIUS**Lu 3:15-16, 21-22**

Akar dapanim: Iesus ruegha God ko migeima, overiam kuiaghirizima Godin duam a bagha zaghiri.

Ia, Krais Iesusin Akar Aghuir Luk osirizim, a baragh.

Gumamaziziba bizir kabar garima men navir averiaba me ginivima me pura nighnigha ghaze, Jon ti God Ua Gumamaziziba Iniasa Misevezir Gumazim? Ezi Jon bar men nighniziba ikara, "Ki dipamin ia rue. Ezi gumazir mam gin izam, an gavgavim bar nan gavgavim gafira. An dagarir asuabar

beniba ki da firan gavgaviba puvati. A Godin Duam ko avimin ia ruam.

Jon gumamaziziba ruer dughiam, Iesus uaghan, Jon a rue. Ezi Iesus uan afeziam God ko migeima, overiam kuiaghrizi, Godin Duam bunbamin nivafizim gavagha a bagha izaghiri. Ezi tiarir mam overiamin otogha

kamaghin migei, “Ni nan Otarim, Otarir
ki ifongezim. Ki ni bagha bar akonge.”

Kar, Krais Iesusin Akar Aghuim.